



Citai di Tarranoa

LI MASCARI

DI LU CARRASCIALI *SALDU*

Lu Carrasciali s'affesta illi paési di la Saldigna tra Pasca di Natali e Pasca d'Abbrili. Palt'e piú cumència o cu' la **festa di Sant'Antoni di lu Fócu (la dí 17 di 'jinnaggju)** o cun chissa di Santu Bastianu o di li Candéli o Santa Maria Friaggjola la dí 2 di Friaggju, e compri a di notti di lu **Malti di Carrasciali**, pa' turrà a cumincià, pa' una dí sólu, la **primma dumínica di Carésima (la Pentolàccia)**.

In tuttu lu trettu di tempu infrà di chisti dí, illi ciurrati a ultiméra di la chita, la dumínica, lu **Gjói di Laldaggjolu** e tutti li ciurrati di festa, si zilibriggjani com'e d'usanza cun baddatoggji, màscari, cilchi, rimbotti e biiti.




PRUGGETTU "LA FOLZA DI LA LINGA"

FINANZIATU DA LA RIGGJONI AUTÒNUMA DI SALDIGNA CU' LU BANDU TULIS - L.R. NR. 22/18 E L.R. NR. 6/12 ANNUALITAI 2025 - 2027

LI MASCARI DI LU CARRASCIALI SALDU

Infrà di li màscari piú cunnotti vi so



LI MASCARI ^{DI LU} CARRASCIALI SALDU

sos Mamuthones e sos Issohadores

Mamujada

La màscara piú mintuata di lu Carrasciali di Mamujada è chissa di li **"Mamuthones"** e di li **"Issohadores"**.

L'esibizioni di chisti màscari è un ritu abbeddu anticu, chi vinia fattu a cumènciu d'annu pa' fà in manéra chi l'annu nòu ússia statu meddu di chissu passatu.

Lu trimuttu di li schiddi selvi pa' tiné allonga li spirienzi mali chi póni fà andà mali l'annu nòu.

Lu gruppu si mustra sempri cu' alumancu **12 o 16 passoni 'istuti di Mamuthones** chi si móini in dui fili chi camínani gali, insembi a **8 o 10 Issohadores**, chi camínani a un latu pa' tutta la sfilata.



LI MASCARI DI LU CARRASCIALI SALDU

La 'istimenta di li Mamuthones

Li "Mamuthones" so vistuti cussì

Mamujada

SA VISERA

Una màscara niédda di lignu

SU MUNCADORE

Un miccalóri in tibbé, liatu intundu a la cara e carraggja lu capu

SU BONETTE

Lu bunettu

SAS PEDDES o MASTRUCAS

Li péddi di pécura niédda
chi li carràggjani

SA CÀRRIGA

Un trappéddu di schiddi di tanti
scéri liati insembi cun currii di
péddi chi pèsani 25 chili

SU BELLUDU

Un vistiri di biddutu niéddu

SOS HUSINZOS

Calzari grossi di péddi

LI MASCARI ^{DI LU} **CARRASCIALI SALDU**



La 'istimenta di li Issohadores

Più briu à la frigura di li Issohadores,
chi so vistuti in chista manéra

Mamujada

SA VISERA 'E SANTU

Una màscara cana di lignu

SU CURITU

Un gjipponi in pannu ruju

SU PANTALONE BIANCU

Li calzoni in culóri canu

SA BERRITA

La barretta niédda

SA HAMISA

Una camísgia in téla,
di culóri canu e
chena códdu

S'ISSALLU

Lu sciallu riccamatu chi pòltani
intundu a lu chintu

SAS CARTZAS

Li ghetti in frési chi carràggiani li
calzari finz'a lu 'jinoccju

SOS SONAJOLOS

Una cìntula in péddi cun schidditti
minóri, posta di traessu innantu
a una spadda

SA SOHA

Un cannau in gjuncu a
folma di trícchia, trabaddatu
da li mastri altisgiani di lu lócu



LI MASCARI DI LU CARRASCIALI SALDU

sa Màschera a Gatu e sos Maimones

Saruli

Li màscari tradizionali di lu Carrasciali di Saruli so la **Màscara a Gatu** e li **Maimones**.

Sa **Màscara a Gatu** polta dui faldetti di lu 'istiri tradizionali di lu paési, **a lu riessu**, pa' cuà li riccami e pa' no fassi cunniscí, una **caldata** in culóri canu innantu a lu capu, com'e signali di nàscita, un **miccalóri niéddu** innantu a la cara com'e signali di la morti e una **balza ruja**, tutta intundu a lu capu, com'e signali di lu cóju. V'è puru un'alta scéra cu' una faldetta sólu, sempri posta a lu riessu, liata a lu códdu, innantu a li calzoni niéddi di biddutu, li gambali e li calzari grossi.

Lu **Maimoni**, in càmbiu, è la màscara di bon augúriu. Illi tempi antichi éra un bambòcciu chi vinia mustratu illu campu pa' buccacci li bèstii mali e augurà una bona annata a li pastóri. Lu Maimoni polta un **paltò in frési**, li calzoni di biddutu, li gambali e li calzari grossi. La cara è carraggjata da una màscara fatta di la pala di ficadíndia sicca ("pane de morisca").

PRUGGETTU "LA FOLZA DI LA LINGA"

FINANZIATU DA LA RIGGJONI AUTÒNUMA DI SARDIGNA CU' LU BANDU TULIS - L.R. NR. 22/18 E L.R. NR. 6/12 ANNUALITAI 2025 -2027



LI MASCARI DI LU CARRASCIALI SALDU

su Bundhu *Orani*

Lu **Bundu** è la màscara típpica di lu Carrasicali d'Orani.

È com'e signali, lu massaju illu Carrasicali.

"**Su Bundu**" è vistutu cu' un gabbanu mannu, una camìsgia e li calzoni di biddutu chi carràggjani l'anchi finz'a li gambali di coggju, li calzari piú trattati pa' trabaddà illa campagna.

La màscara è fatta, di régula, da l'altisgiani di lu lócu cu' lu **súaru**. È lu sólu passunaggju di lu Carrasicali, infrà chiddi agattati finz'abali in Saldigna, chi cóa la cara sott'a una màscara fatta sólu di súaru, cu' li **corri longhi** e lu **nasu mannu** e a piccjaroni, la **balbitta** e li **mustacci** a pustíciu.

La màscara cu' la cara scuntiviciata è in culóri **ruju** granatu. Invecci la balbitta, li mustacci e li corri so in culóri canu.

La màscara di lu Bundu cumència a andà in ggiuru candu s'accèndini li fòchi di Sant'Antoni e dapói accompagna lu Carrasicali d'Orani. Candu v'è la sfilata, cun un fulconi faci lu 'essu di siminà buciendi com'e sempri pa' aè l'attinzioni di la 'jenti.

LI MASCARI DI LU CARRASCIALI SALDU

sos Thurpos

Oroteddi

Li màscari tradizionali di lu Carrasciali d'Orotédidi so li **Thurpos**.

Li Thurpos pòltani un **gabbanu di frési niéddu** cu' lu capparoni innant'a l'occi, calzoni e casacca di biddutu, scalponi e gambali di coggju, una banduléra di schiddi e un kannau liatu a lu chintu. Ani la **cara fatta niédda** da lu súaru brusgiatu, chi selvi, insempi a li schiddi, a tiné allonga lu mali.

Dui di li Thurpos àndani addananzi, gjunti com'e li **bói** e di li bói fàcini lu 'essu e stani spidichinendi. Lu **massaju** patronu sóju, "**su Thurpu voinarzu**", li cumanda, li inzinga e li polta cu' li rétini, lu puntògliu e l'úrruli li spronani a trabaddà. Una cjobba di chisti bói, trasginíggjani un aratu posti infattu da "**su Thurpu semenadore**", chi **siminiggja lu tricu** piddèndilu da un móju e tirèndilu innant'a la 'jenti.

Faci cussí pa' augurà abbondànzia e prosperitai pa' lu tempu 'inidóri. Dapói infattu v'è lu **frailaggju** o "**su Thurpu vrailarzu**", cu' la cascetta di la farramenta, chi dugna tantu si felma pa' farrà li bói.

Ancóra siddu li thurpos ani diffarenti mansioni, **li 'istiri so tutti gali**: chistu vó dí chi, illu trabaddu di li campi, **l'omu e lu bistiamu érani cant'e paru**, auniti da un liamu chi no si pó sciuddí, signalati da li cannai chi líani lu massaju a lu 'juu e lu 'juu a lu massaju.



LI MASCARI ^{DI LU} CARRASCIALI SALDU

sos Urthos e Butudos

Fonni


Li màscari tippichi di lu Carrasciali di Fonni
so li **Urthos e Butudos**.

Chisti dui friguri, candu éscini,
so la rappresantazioni di lu **liamu**
tra omu e bèstia.

L'**Urthu** è la **bèstia** chi vó fuggjissinni,
vistutu di péddi di pécura,
cu' la cara niédda.

Li **Butudos** cìlcani di **calmà la**
bèstia tinèndila cu' una catena
chi pòltani liata a lu chintu.
"Sos Butudos" so vistuti cu' un
gabbanu di frési niéddu e una
cìntula di schiddi liata a lu códdu.

Tutt'e dui ani la **cara niédda** da lu zinziéddu.
Éscini a sfilà lu malti di carrasciali in Fonni.



LI MASCARI DI **CARRASCIALI SALDU**

sos Mamutzones


Samugheu

La màscara tradizionali di lu Carrasciali di Samugheu è chissa di "sos **Mamutzones**". Di chista màscara fàcini palti tre friguri: "**su Mamutzone**", "**s'Urtzu**" e "**s'Omadore**".

Lu **Mamutzone** polta calzoni di frustanu o di biddutu niéddu e péddi di capra; li gambali di coggju, carraggjati di péddi di capra; liati a lu chintu, polta tanti **campanéddi**, e illu pettu, tanti **schiddi**. À la cara, **niédda** da lu zinziéddu di súaru brusgiatu, polta un **cappéddu** fattu da un cunchinu di súaru, rivistutu di **lana di capra**, cun dui **corri di capra** o di **bóju**. Li campanéddi e li schiddi, sunendi, ci mândani li bèstii mali da la sfilata.

L'**Urtzu** è lu **malassultatu** di la sfilata. Polta innantu a lu pettu **péddi di caprittu** e schiddi pisuti. Sutt'a la péddi, cóa una "serràggia", un pisciali pienu d'ea misciata a sangu, chi veni punta pa' fà cascà tuttu in tarra.

L'**Omadore** (dumadóri) è la frigura di lu **pastóri**. Polta li botti grossi di campagna, un paltò longu niéddu di frési, cu' lu capparoni finz'a lu nasu. La cara è niédda di zinziéddu. Polta in manu un cannau, un roccju, una catena e un puntògliu. Com'e signali, l'Urtzu è tinutu da un cannau a li fianchi, da "su Omadore", lu so' gualdianu, e dugna tantu si lampa in tarra fèndisi patimà primma di muri.



LI MASCARI DI LU CARRASCIALI SARDU

Boes e Merdules e sa Filonzana Ottana

Li màscari più mintuati di lu Carrasciali d'Ottana so li **Boes e Merdules**.

Lu nommu "Merdules" ignitta tutti li màscari d'Ottana.

Lu "**Merdule**" pròppiu polta la màscara cu' la **cara d'omu**.

Lu nommu si pensa chi vènghia da lu tempu di li narachi: "*mere*" = patronu e "*ule*" = bóju, dunca lu **patronu di lu bóju**.

Li "**Boes**" pòltani la màscara cu' la **cara di trau**, cu' olnamenti fatti cun punciottu e cultéddu. La frigura di lu trau, antica divinitai, è símbulu di folza e v'era sempri illa civiltai di lu Mediterràneu.

V'è puru una frigura di fèmina illu Carrasciali d'Ottana, l'única in Saldigna: "**sa Filonzana**" (la *Filugnana*). È una fèmina buggjosa chi fila l'accióli cu' la ruédde e dà l'òldini a li rittili prèsi di murí. Lu filu di lana, in bàlziga, è la 'ita chi la filonzana teni illi mani sói, dizzidendi la solti di tutti.

LI MASCARI DI LU CARRASCIALI SALDU

su Batileddu

Lula

Su **Batileddu** è la màscara tippica di lu Carrasciali di Lula.

Lu nommu di la màscara arréa da la paràula "*bàtile*", chi in saldu vó dí "cosa chi no selvi". candu si ignitta una passona cun chista paràula, li so dicendi chi è un "bon'a nudda".

Lu Battiléddu è lu malassultatu di lu Carrasciali. È vistutu cun **coggi nièddi di pécura**, à la **cara nièdda** di zinzièddu e **imbruttata di ruju** com'e a parí sangu; innant'a lu pettu à un muntoni di schiddi, innant'a lu capu un **miccalóri nièddu** di fèmina e corri di capra. Illu pettu teni cuatu un pezzu di lu **stògamu di una pécura** pienu di sangu.

Alti Battiléddi accumpàgnani lu malassultatu e so vistuti di stracci. Vi so puru "**sos Batileddos issogadores**" chi valdiiggiani cu' li cannai lu bistiamu, invecei alti battiléddi so bói 'junti. Candu lu Battiléddu casca in tarra, calch'e unu buciaggja: «L'ani moltu, Déu méu, l'ani scannatu!».

Parò basta una tazza di 'inu pa' turrallu a abbivà.

Dugna tantu li màscari si pòsani in tundu e gjócani a "pizzichiggja e no ridí". Si fàcini la cara nièdda unu cu' l'altu cu' lu zinzièddu, filmendi cagliati e arrisittati, e ca ridi pa' primmu à di pacà a bí a tuttucanti.



LI MASCARI ^{DI LU} CARRASCIALI ^{SALDU}

sos Corriolos

Neunéli

Li màscari tradizionali di lu Carrasciali di Neunéli so li **Corriolos**.

La màscara è turrata a campu da pocu, gràzzii a unu stúdiu innantu a documenti di lu 1700. Pòltani una **péddi di pécura** o di capra e innantu a li spaddi una péddi di ricciu di maccja; pòltani puru un cappéddu di súaru cun dui **corri manni di celvu**.

A diffarènzia di l'alti màscari saldi chi pòltani li schiddi, chista polta e mói tanti **ossaréddi di rittili liati insembi**.

Lu baddu chi fàcini è abbeddu impultanti: intundu a lu fócu, sighendi la músiga di un corru, banzichendi a tempu tutti l'ossi.



LI MASCARI DI **CARRASCIALI SALDU**

su Componidori


Aristani

Sa Sartiglia è un palu a cabaddu chi si curri la dumínica e lu malti a lu cumpritoggu di lu Carrasciali in Aristani.

Dugna annu, la dí 2 di friaggju, a la Festa di li Candéli, li suprastanti di lu **Grèmiu di li Massai** e di chissu di li **Mastri d'àscia** numiníggjani lu so' **Cumpunidóri**, chi è lu 'éru e próppiu signóri di la festa.

La Sartiglia è tuttu innant'a chista frigura di lu Cumpunidóri. La dí di lu palu, lu primmu attu ufficiali è la 'istitura. Illu lócu appustatu da lu grèmiu si faci la cirimónia piú manna di la Sartiglia: lu caagliéri sciuaratu 'eni 'istutu a "componidori" da stéddi abbeddu gaffi vistuti cu' l'anticu 'istiri d'Aristani, chi vènni aggjutati da una fèmina piú spelta.

Iddu 'eni 'istutu cun **calzoni di péddi**, una **camísgia in culóri canu** com'e la nii e una casacca di péddi longa. Innant'a la cara polta una màscara chi signala lu màsciu e la fèmina. Innant'a lu capu à un **miccalóri riccamatu** e un **cappéddu a cilindru**. Lu cumpunidóri di lu Grèmiu di li Massai à una màscara in culóri di **tarrapadédde** e chissu di li Mastri d'àscia n'à una in culóri di **céra**.





Citai di Tarranoa



LI MASCARI

DI
LU **CARRASCIALI** *SALDU*

BOCI DI SIMONA BRANDANO

Pruggjettu “**LA FOLZA DI LA LINGA**”

Finanziatu da la
Riggjoni Autònoma di Saldigna
cu’ lu Bandu TuLiS

L.R. nr. 22/18 e L.R. nr. 6/12

Annualitai 2025 -2027